



**STATEN VAN ARUBA**

Na Presidente di Parlamento  
Sra. drs. M. Lopez-Tromp

Aruba, 23 di oktober 2014

Respetabel Sra. Presidente,



**Pa medio di e carta aki mi kier haci un peticion na bo persona pa entrega e siguiente preguntanan na Minister responsabel pa Salubridad, Deporte y Cuido di nos grandinan, dr. Alex Schwengle pa haya contesta por escrito pa cu e siguiente preguntanan, a base di articulo III.7 di nos Constitucion y articulo 59 di Ordo di Parlamento**

Ultimo tempo e problematica di e malesa **Ebola** ta den noticia mundialmente y nos por a tuma nota cu na Merca e topico aki a wordo discuti ampliamente den Parlamento y cu presidente Obama a duna su comentarionan riba e tema aki. Na Hulanda e topico a wordo discuti ampliamente unda expertonan di diferente instancia di salubridad a duna informacion tocante e ultimo desaroyonan rond di Ebola. Ebola a drenta Merca y nos por a lesa e informacion cu un pasahero riba un barco di crucero di Carnival Cruise Line probablemente por a trata "specimens" di Ebola den un laboratorio. E no ta e intencion pa crea, ni pa sembra panico den pueblo, pero e ta mas cu obvio cu nos mester ta prepara pa cualkier situacion, principalmente teniendo cuenta cu Aruba ta un pais turistico.

E preguntanan ta lo siguiente:

1. Minister tin un plan di accion prepara pa Aruba caba pa cu:
  - a. E facilidadnan cu lo wordo uza na hospital
  - b. Tratamento di e pashent infecta
  - c. Instruccion pa personal
  - d. Cuido di personal
  - e. Higiene y desperdicio etc.
  
2. Minister tin un plan di prevencion pa cu e malesa aki?


Nos hendenan ta biaha hopi pa exterior y nos ta haya bishita di hopi hende di afor cu e consecuencia cu unda diariamente nos hendenan ta den contacto cu pasaheronan p.e. e trahadornan na aeropuerto, waaf, hotel etc.

3. Minister por splica si tin un maneho di cooperacion entre su persona, minister Otmar Oduber (turismo) y minister Arthur Dowers (immigracion y aduana) pa cu e situacion di Ebola si e mester presenta su mes na Aruba?

4. Tin un plan riba mesa pa cu conscientisacion di pueblo riba e topico aki y kico pa haci si bo ta kere cu bo tawata den contacto cu un hende cu tin Ebola
5. A cuminsa pensa riba screening na e entradanan di aeropuerto y waaf pa cu turistanan cu ta duna indicacion cu nan ta hopi malo of cu a bishita paisnan afecta cu Ebola e ultimo lunanan.
6. Tin un control mas critico riba importacion legal of ilegal di bestianan manera macaco di exterior?
7. Kico ta e pasonan/medidanan cu minister ta bay tuma den futuro cercano pa cu e malesa aki?
8. Si minister tin contacto cu otro minister di Salubridad den region pa cu un plan di maneho pa cu e malesa aki?

Ta spera di por haya contesta di e preguntanan por escrito di e Minister concerni mas pronto cu ta posibel.

Atentamente,



Lorna C. Jansen-Varlack  
Miembro di Fraccion/AVP

Oranjestad, 23 di oktober 2014